

明

通

鑑

明通鑑卷九十

江西永甯知縣當塗夏燮編輯

紀九十

閏逢君灘起春
正月盡夏四月

莊烈皇帝

崇禎十七年春正月庚寅朔大風蕤鳳陽地震 是日
李自成僭號于西安自成久覬尊號懼張獻忠爲患既
入秦通好獻忠獻忠厚幣遜詞以報之自成喜遂僭稱
王改名自晟國號大順改元永昌追尊其曾祖以下加
謚號以李繼遷爲太祖設天佑殿大學士以牛金星爲
之增置六政府尙書等僞官以宋企郊爲吏政尙書陸

之祺爲戶政尙書鞏煇爲禮政尙書張麟然爲兵政尙書復五等爵大封諸臣侯劉宗敏以下九人伯劉體純以下七十二人子三十人男五十五人定軍制有一馬僂行列者斬之馬騰入田苗者斬之籍步兵四十萬馬兵六十萬令宏文館學士李化鱗等草檄馳諭遠近指斥乘輿有云君非甚暗孤立而煬竈恒多臣盡行私比黨而公忠絕少又云獄囚纍纍士無報禮之心征歛重重民有偕亡之痛見者無不扼腕時囚衆有邱從周者都司吏也長不滿三尺素懷義憤伺自成出乘醉直至其前戟手罵曰若一貧賤細民今妄據王府僭稱偽號

逆天悖理吾見汝屍之萬段也自成大怒立斫殺之

異攷

自成僭偽號于西安明史本紀不載而流賊傳特書于十七年正月庚寅朔三編亦書朔字今從之

庚

子輔臣李建泰自請督師勦賊建泰山西人李自成初逼山西建泰慮鄉邦被禍家富于貲可籍佐軍毅然有滅賊志常與同官言之會上聞自成僭號大驚且嘆曰朕非亾國之君事事皆亾國之象祖宗櫛風沐雨之天下一朝失之何面目見于地下朕願督師親決一戰身死沙場無恨但死不瞑目耳語畢痛哭陳演蔣德璟諸閣臣請代俱不許建泰頓首日臣家曲沃願出私財餉軍不煩官帑請提師以西上大喜慰勞再三曰卿若行

朕當仿古推轂禮遂加建泰兵部尙書賜尙方劍便宜從事乙卯行遣將禮以特牲告太廟上御正陽門樓衛士東西列自午門抵城外旌旗甲仗甚盛內閣五府六部都察院掌印官及京營文武大臣俱侍立鴻臚贊禮御史糾儀賜之宴御席居中諸臣陪侍酒七行上手金卮親酌建泰者三乃出手敕曰代朕親征建泰頓首謝且辭行上目送之行數里所乘肩輿忽折衆以爲不祥建泰以宰輔督師兵食竝絀所攜止五百人甫出都而曲沃已破家貲盡沒驚悸而病日行三十里士卒多道亡者 南京地震 丙辰以工部尙書范景文禮部侍

郎邱瑜竝兼東閣大學士預機務初景文擢兵部添註
侍郎練兵通州通鎮初設兵皆召募景文綜覈有法治
軍精嚴嘗請有司實行一條鞭法徭役歸之官民捐貲
助其費供應平買不立官價名上令永著爲例繼拜兵
部尙書以事削籍後起用改工部至是李建泰出督師
景文遂以本官與瑜同入闕召對謂曰朕知卿久今急
而用卿恨晚卿尙勉之景文請釋繫獄張國維等上立
從之李自成漸逼京師有請上南幸者命集議閣中景
文言固結人心堅守待援而已此外非臣所知上是其
言是月張獻忠入四川獻忠自荊州趨蜀所過十三

隘口守兵皆以饑故不能戰至是犯夔州石碛士官秦良玉馳援兵敗歸獻忠至萬縣水漲留屯者三月貢生吳獻棐被執與子之英俱不屈死攻梁山副榜高宗舟拒戰死

攻累萬縣殉難諸書皆不載此據蜀碧增

二月辛酉李自成陷汾

州先是平陽送欵自成渡河破蒲州遂連陷汾州知州

侯君招汾陽知縣劉必達

明史必達出罵賊文賊誦而殺之

俱死之其

義勇范奇芳刺殺一僞都尉而自刎賊又遣其別部陷

懷慶而自率兵攻太原先是巡撫山西都御史崑山蔡

懋德聞李自成據西安盡有三秦地將窺晉亟出師平

陽以疲兵三千當百萬狂寇而太原洶洶晉王手檄趣

懋德還省懋德于去年十二月十八日遂去平陽二十日賊抵河津副將陳尙智失守奔還平陽二十二日賊拔平陽尙智出走二十八日懋德還太原至是賊渡河轉掠河東列城皆陷于是山西巡按御史汪宗友上言曰晉河二千里平陽居其半撫臣懋德不待春融冰泮遽爾平陽返旆賊卽于次日報渡矣隨行馬步千人卽宜倍道西向召集陳尙智叛卒移檄各路防兵援勦乃不發一兵歲終至省匝月餘郡皆失是誰之過歟有詔奪官候勘時尙智叛降于賊懋德誓師于太原官吏軍民咸在懋德哭衆皆哭罷官命適至或請出城候代懋

德不可曰吾已辨一死遂調兵堅守甲子賊薄城下遣部將牛勇朱孔訓王永魁等出戰收績懋德草遺表調部將張雄守大南門雄已縋城降賊語其黨曰城東南角樓火器火藥皆在我下卽焚樓夜中火起風轉烈守者皆散丙寅賊遂登城懋德北面再拜出遺表付人間道達京師卽自刎麾下持之時中軍副將應時盛請下城巷戰顧懋德曰上馬懋德上馬時盛持矛突殺賊數十人旣而賊騎充斥時盛呼曰出西門懋德遽下馬曰我當死封疆諸君自去衆復擁懋德至水西門懋德叱曰欲陷我不忠耶復下馬據地坐時盛已出城殺妻子

還顧不見復斫門入語懋德曰請與公俱死懋德就縊
未絕時盛釋甲加其肩乃絕時盛取弓弦自經死同時
牛勇朱孔訓王永魁等亦自刎其餘官吏則有布政使
趙建極罵賊死明史本傳建極河南永甯人賊掠永甯副
使毛文炳被執不屈死妻趙氏妾李氏陳氏俱投井死
參議蘭剛中不屈被殺首既墮復躍起丈餘賊皆辟易
僉事畢拱辰被執賊適得新刀拱辰睨之問何睨曰欲
得此斫頭耳遂取斬之知府孫康周巷戰死同知李一
清長史范志泰副將惠光祚俱不屈死都司張宏業自
縊死妻趙氏子凝秀俱殉之指揮韓似雍千戶王德新

晉府典仗官樊于英皆城陷殉節死自懋德以下太原
死事凡四十有六人賊入城脅晉王求桂執之後從入
北京不知所終 壬申下詔罪已畧曰朕嗣守鴻緒十
有七年深念上天陟降之威祖宗付託之重宵旦兢惕
罔敢怠荒乃者災害頻仍流氛日熾赦之益驕撫而輒
叛甚有受其煽惑頓忘敵愾者朕爲民父母不得卵翼
之民爲朕赤子不得懷保之罪非朕躬誰任其責所以
使民罹鋒鏑蹈水火殲量以整骸積成邱者皆朕之過
也使民輸芻輓粟居送行齋加賦多無藝之征預支有
稱貸之苦者又朕之過也使民室如懸磬田卒汙萊望

烟火而無門號冷風而絕命者又朕之過也使民日月
告凶旱潦薦至師旅所處疫癘爲殃上千天地之和下
叢室家之怨者又朕之過也至于用大臣而不法用小
臣而不廉言官植黨而清議不聞武將驕懦而軍功不
奏皆由朕撫馭失道誠感未孚中夜此心跼蹐無地朕
自今痛加創艾深省夙愆要在惜人才以培元氣守舊
制以息煩譁行不忍之政以收人心蠲額外之科以養
民力其罪廢諸臣有公忠正直廉潔幹才尙堪用者不
拘文武吏兵二部確覈推用草澤豪傑之士有恢復一
郡一邑者授官世襲卽陷沒脇從之流能舍逆返正率

衆來歸許赦罪立功擒闖獻二賊仍予封侯之賞忠君愛國人有同心雪恥除凶誰無公憤尙懷祖宗之厚澤助成底定之大勲思免厥愆厯告朕意 癸酉賊連陷黎城臨晉遂陷潞安執藩世子

藩簡王模裔簡王封潞故潞府在潞安

乙亥李自成攻代州先是自成陷全陝將犯山西總兵官錦州衛周遇吉以沿河千餘里賊處處可渡分兵扼其上流以下流蒲坂屬之巡撫蔡懋德而請濟師于朝朝廷遣副將熊通以二千人來赴正月遇吉令通防河會平陽守將陳尙智已遣使迎賊諷通還鎮說降遇吉叱之曰吾受國恩甯從爾叛逆且爾統兵二千不能

殺賊反作說客邪立斬之傳首京師及是賊陷太原述
陷忻州遂圍代州遇吉先駐師在代扼其北犯之路馮
城固守而潛出兵擊賊連數日殺賊無算會食盡援絕
退保甯武關 丁丑賊別將陷固關犯畿南固三編作
故質實在
井陘縣西界接 山西平定州 河間知府方文耀南宮知縣彭士宏死
之 己卯遣內臣高起潛杜勳等十人監視諸邊及近

畿要害

三編發明日明事至此存亡在于呼吸矣而猶遣內
臣監邊鎮守畿輔一切要地畀之宵小于是若輩專
守城事百官皆不敢問雖有忠義之士且爲掣肘而

莫可如何卒之賣國售奸如杜勳杜之秩等自以所
守關城降賊而曹化淳旋復開門迎賊觀勳勸求禪
位及我輩富貴固在之言可勝痛恨哉夫有明蠹政
莫甚於信用內臣監軍鎮守覆轍累累莊烈際危急
之秋尚不惜躬蹈其敗可謂至死不悟者矣歐陽修
五代史傳論有云自古宦者之禍深矣明者未形而
知懼暗者患及而猶安焉至于亂亡而不可悔也信
夫

壬午賊將劉方亮自固關分兵趨真定檄總督徐標降
標斬其使率衆拒守真定知府邱茂華與中軍謝加福

殺標迎降督標游擊陳三捷死之城遂陷又分兵陷大名分巡副使朱庭煥死之 甲申賊至彰德趙王常洵降常洵趙王高燧後裔也 丁亥詔天下勤王命廷臣議戰守事宜先是賊陷山西左都御史李邦華密疏請上固守京師倣永樂朝故事太子監國南京居數日不得命又請以定永二王分封太平甯國二府拱護兩京上得疏意動繞殿行且讀且歎將行其言會上召對廷臣中允李明睿疏言南遷便給事中光時亨以倡言洩密糾之上曰國君死社稷正也朕志定矣遂罷邦華策不議 戊子陳演罷演與魏藻德排去周延儒演遂爲

首輔上倚信演臺省附延儒者盡趨演門當是時國勢累卵中外舉知其不支演庸才寡學一無籌畫顧以賄聞及李自成陷陝西逼山西廷議撤甯遠總兵吳三桂兵入守山海關策應京師上意亦然之演持不可後上決計行之三桂始用海船渡遼民入關往返者再而自成已陷宣大矣演懼不自安引疾求罷詔許之賜道里費五十金彩幣四表裏乘傳行演既謝事薊遼總督王永吉上疏力詆其罪請置之典刑演入辭自言佐理無狀上怒曰汝一死不足蔽辜叱之去演貲多不能遽行遂留京師 李自成陷甯武總兵官周遇吉死之先是

遇吉退守甯武賊亦踵至大呼五日不降者屠其城遇
吉四面發大礮殺賊萬人火藥且盡外圍轉急或請甘
言紿之遇吉怒曰若輩何怯耶今能勝一軍皆忠義卽
不支縛我予賊于是設伏城內出弱卒誘賊入城亟下
閘殺數千人賊用礮攻城圯復完者再傷其四驍將自
成懼欲退其將曰我衆百倍于彼但用十攻一更番進
蔑不勝矣自成從之前隊死後復繼官軍力盡城遂陷
遇吉巷戰馬蹶徒步跳盪尙格殺數十人身被矢如蝟
竟爲賊執大罵不屈賊懸之高竿叢射殺之遇吉妻劉
氏素勇健率婦女數十人據山巔公廨登屋而射每一

矢斃一賊賊不敢逼縱火焚之闔家盡死城中士女無降者自成集衆計曰此去厯大同陽和宣府居庸皆有重兵倘盡如甯武奈何不如且還俟再舉而大同總兵姜瓖宣府總兵王承允降表相繼至自成大喜遂長驅而東 是月賊陷山西州縣官吏殉城死者安邑知縣房之屏城陷入砮拜其母命妻子各自盡遂投井賊曳出斬之忻州知州楊家龍知城不能守出城罵賊而死其里居殉節者陽城故參政王徵俊城陷被執不屈繫之獄士民爭頌其德賊乃釋之抵家北面再拜投繯死舉人張履旋南吏部尙書慎言子也城陷投崖死靈石

故登萊監軍副使宋之雋被執就刑死妻喬氏詈賊撞
階死女歛尸畢拔簪刺喉死翼城故中書舍人史可觀
城陷自縊死又太原之陷陽曲晉府宗室攝靈邱郡王
府事朱慎鏤冠帶祀家廟驅家人入廟中焚之已亦投
火死代州之陷參將閻夢夔戰沒甯武之陷兵備副使
王孕懋斬說降賊使與遇吉共守城陷自殺妻楊投井
殉焉而同時別賊入懷慶監司以下皆竄走獨河內知
縣丁泰運守南城力不支被執賊擁見劉方亮使跪不
屈燒鐵鎖炙之亦不從乃遇害時廬江王載堙鄭簡王
元孫也城陷冠服坐堂上詬罵不屈死長子翊檄爲賊

擁至途中不食死

及異此據明史諸王傳補

賊尋陷彰德有刑部郎

中尙大倫者以黃道周繫獄事忤尙書意罷歸城陷抗

節死又有王樞徵者由鄉舉厯官蒲州知州忤豪宗謝

事歸爲賊所執傳詣李自成道中憤恨不食死

及異自房之屏

以下諸死事者皆見明史蔡懋德及忠義傳賊陷山西

州縣係是月事而遣別賊陷懷慶彰德亦在同月今彙

系之二 三月庚寅

及異明史本紀三月庚寅朔按諸書皆書四月戊午朔則三月實巳

丑朔也今從新厯又明史天文志亦云是年三月己丑

朔而諸書記大同之陷于二月初二日是本紀誤記衍

也 賊至大同總兵姜瓖及監視宣府太監杜勲俱降

于李自成先是瓖等上降表巡撫韓城衛景瑗不知也

聞警方歆血誓師要與固守而瓖布謠言謂衛巡撫秦

人將應賊代王傅濟

簡王桂十世孫

果疑之不見景瑗會景瑗

有足疾不時出兵事瓌主之瓌兄瑄故昌平總兵也勸

瓌降賊瓌慮其下不從有犒之銀者言勵守城將士代

王信之諸郡王分門守瓌每門遣卒二百人助守至是

賊抵城下瓌卽開門迎賊入給景瑗計事景瑗乘馬出

始知其變也自墜馬下賊執之見自成欲官之景

瑗據地坐大呼皇帝而哭賊義之曰忠臣也不殺景瑗

猝起以頭觸階石血淋漓賊引出顧見瓌罵曰反賊與

我盟而叛神其赦汝邪賊使景瑗母勸之降景瑗曰母

年八十餘矣當自爲計兒國大臣不可以不死母出景

瑗謂人曰我不罵賊者以全母也自縊于僧寺賊嘆曰忠臣移其妻子空舍戒毋犯殺代王及其宗室殆盡總兵官朱三樂戰沒分巡副使朱家仕盡驅妻妾子女入井而已從之死者十有六人督儲郎中徐有聲攷異據

總兵朱三樂見三編京師陷目中山陰知縣李倬亦死

質實云賊陷大同死之今增入之諸生李若葵攷異葵明史三編作蔡然其兄弟皆以葵名似蔡字傳烏誤也與兄象

葵弟心葵從子柱周及婦女五人皆自縊題曰一門完

節賊既陷大同以兵徇陽和長驅向宣府 辛卯督師

李建泰疏請南遷壬辰召廷臣于平臺示建泰疏復曰

國君死社稷朕將焉往 輔臣蔣德璟罷初周延儒爲

相各樹門戶德璟無所比性頗直黃道周召用劉宗周免罪德璟之力居多開封久被圍自請馳督諸將戰優詔不允嘗進御覽備邊冊凡九邊十六鎮新舊兵食之數及屯鹽民運漕糧馬價悉志焉已進諸邊撫賞冊及御覽簡明冊上深嘉之諸邊士馬報戶部者浮兵部過半耗糧居多而屯田鹽引民運每鎮至數十百萬一聽之邊臣天津海道輸薊遼歲豆米三百萬惟倉場督臣及天津撫臣出入部中皆不稽覈德璟語部臣合部運津運各邊民運屯鹽通爲計畫餉額可足而加派之餉可裁因復條十事以責部臣然卒不能盡釐也一日召

對上語及練兵德璟曰會典高皇帝教練軍士一以弓
弩刀鎗行賞罰此練軍法衛所總小旗補役以鎗勝負
爲升降凡武弁比試必騎射精嫻方准襲替此練將法
豈至今方設兵上爲悚然又言祖制各邊養軍止屯鹽
民運三者原無京運銀自正統時始有數萬迄萬厯末
亦止三百餘萬今則遼餉練餉并舊餉計二千餘萬而
兵反少于往時耗蠹乃如此又言文皇帝設京衛七十
二計軍四十萬畿內八府軍二十八萬又有中部大甯
山東河南班軍十六萬春秋入京操演深得居重馭輕
之勢今皆虛冒且自來征討皆用衛所官軍嘉靖末始

募兵遂置軍不用至加派日增軍民兩困願憲章二祖
修復舊制上是之而不果行戶部主事蔣臣請行鈔法
言歲造鈔三千萬貫一貫價一兩歲可得銀三千萬兩
上特設內寶鈔局晝夜督造募商發賣無一人應者德
璟言百姓雖愚誰肯以一金買一紙上不聽又因局官
言責取桑穰一百萬斤于畿輔山東河南浙江德璟力
爭獲免先以軍儲不足歲僉畿輔山東河南富戶給值
令買米豆輸天津多至百萬民大擾德璟因召對面陳
其害上卽令擬諭罷之至是賊勢漸逼李建泰自保定
疏請南遷上召廷臣于平臺諭以死社稷德璟與少詹

事項煜請命太子往江南上不答給事中光時亨追論
練餉之害德璟擬旨向來聚斂小人倡爲練餉致民窮
禍結誤國良深上不悅詰曰聚斂小人爲誰且曰朕非
聚斂但欲練兵耳德璟曰陛下豈肯聚斂然既有舊餉
五百萬新餉九百餘萬復增練餉七百三十六萬臣部
實難辭責且所練兵馬安在薊督練四萬五千今止二
萬五千保督練三萬今止二千五百保鎮一萬今止二
百若山永兵七萬八千薊密兵十萬昌平兵四萬宣大
山西及陝西三邊各二十餘萬一經抽練原額兵馬俱
不問并所抽亦未練徒增餉七百餘萬爲民累耳上曰

今已并三餉爲一何必多言德璟曰戶部雖并爲一州縣追比仍是三餉上震怒責以朋比德璟力辨諸輔臣爲申救尙書倪元璐以鈔餉乃戶部職自引咎上意稍解明日德璟具疏引罷上雖旋罷練餉而德璟竟去位德璟聞山西陷未敢行辭朝後卽移寓外城無何都城陷得逸去是日欽天監奏帝星下移癸巳封總兵官吳三桂左良玉唐通黃得功俱爲伯三桂平西伯通定西伯良玉甯南伯得功靖南伯甲午徵諸鎮兵俱入援乙未總兵官唐通入衛命偕中官杜之秩守居庸關戊戌命太監王承恩提督京城內外防守己亥

李自成至宣府巡撫大興朱之馮集將吏于城樓歃血
誓死守懸賞格勵將士而人心已散監視中官杜勳且
與總兵王承允爭先納款矣見之馮請以城下賊之馮
大罵曰勳爾上所倚信特遣爾以封疆屬爾爾至卽通
賊何面目見上勳不答笑而去俄賊且至勳蟒袍鳴騶
郊迎三十里外將士皆散之馮登城太息見大礮語左
右爲我發之默無應者自起熱火則礮孔丁塞或從後
擊其肘之馮撫膺歎曰不意人心至此仰天大哭賊至
城下承允開門納之訛言賊不殺人且免徭賦則舉城
譁然皆喜結彩焚香以迎左右欲擁之馮出走之馮叱

之乃南向叩頭草遺表勸上收人心厲士節自縊而死
賊棄屍濠中濠旁犬日食人屍獨之馮無損也同日死
者督糧通判朱敏泰諸生姚時中副將甯龍及繫獄總
兵官董用文副將劉九卿及里居知縣申以孝其他婦
女死義者又十餘人初濟南未破之馮方賚表入都寄
其帑未幾城陷之馮妻馮氏匿姑及子于他所自沈井
死姑李聞之爲絕粒死之馮廬墓三年始出至是及于
難 癸卯唐通杜之秩以居庸關降于自成賊遂入關
甲辰陷昌平焚十二陵總兵官李守鏐力戰死 乙巳
賊犯京師始自成欲知京師虛實往往遣其徒輦重貨

賈販都市又令充部院掾吏探刺機密朝廷有謀議千里立馳報及陷昌平兵部發騎偵探輒被勾去無一還者于是賊游騎直至平則門而都人猶未知也上召問羣臣莫對有泣者頃之賊環攻九門門外先設三大營賊至潰降相繼守埤者寥寥益以內侍三四千人專守城事百司皆不敢問丙午自成設座彰義門外降賊太監杜勳侍勳射書入城稱賊勢盛請上自爲計上卽日下手詔親征又下罪己詔盡罷加派新舊餉尋召駙馬都尉鞏永固令以家丁護太子南行永固叩頭曰親臣不藏甲臣安敢有家丁相向涕泣而已

致異据明史朱之馮傳言杜勳

射書城中初傳勲死宣府之難帝予贈蔭立祠至是城中疑爲鬼王承思倚女牆而與語縋入見帝盛稱自成請帝自爲計復縋之出笑語諸守監曰吾輩富貴自在也又宦官傳亦載其事且言勲入見帝左右請留之勲曰不返則二王危乃縱之出復縋下云云按諭德揚土聰甲申核真畧但言杜勲射書城中而力辨其無縋城見帝之事士聰身在圍城中且言三月十八日搆炳帝猶召輪對日講詹翰官四員入侍士聰與同官衛允文預焉安有勲縋城入見帝而侍臣不聞者况事勢呼吸降賊當前以莊烈英斷有餘豈不能爲建文手刃徐增壽之事而顧以一叱縱之耶且帝是時不能保其太子又何暇念及于秦晉二王何況其身繫賊庭死不足惜勲亦安能以危詞聳聽邪今但書勲射書城中請自爲計餘悉刪之

是日晡外城陷時

賊架飛梯攻西直平則德勝三門官軍皆潰而諸璫守城者潛謀內應于是太監曹化淳啟彰義門賊盡入上出宮登山望見烽火徹天嘆息曰苦我民耳徘徊久之

遷宮命分送太子永定二王子勲戚周奎田宏遇第其
父皇后周氏崩奉旨自盡也趣呼左右進酒飲金卮十
數乃手劍斫長平公主嘆曰汝何故生我家又斫昭仁
公主于昭仁殿竝袁妃諸嬪數人惟袁妃及長平公主
未殊夜分內城陷 丁未帝崩于萬歲山之壽皇亭中
官王承恩從殉焉亭新成帝所閱內操處也質明帝聞
城陷鳴鐘集百官無至者乃與承恩登山帝御絳黃袍
跌左足書衣襟爲遺詔曰朕涼德藐躬上干天咎致逆
賊直逼京師皆諸臣誤朕朕死無面目見祖宗自去冠
冕以髮覆面任賊分裂無傷百姓一人以帛自縊于山

亭承恩縊于側同時文武諸臣殉難者大學士范景文
吳橋人聞城陷趨至宮門知駕出疑爲南幸乃就道旁
廂草遺疏復大書曰身爲大臣不能滅賊雪恥死有餘
恨遂至演象所拜辭闕墓赴雙塔寺旁古井死戶部尙
書倪元璐上虞人聞難整衣冠拜闕大書几上曰南都
尙可爲死吾分也勿以衣衾斂暴我屍志我痛遂南向
坐取帛自經死一門殉者十三人左都御史李邦華吉
水人賊至率諸御史登城羣奄拒之不得上外城陷走
宿文信國祠及內城陷乃揖信國曰邦華死國難請從
先生于九京作絕命詞投繯死協理戎政兵部右侍郎

王家彥莆田人分守安定門帝手敕兵部尙書張縉彥登城察視家彥從爲中官所拒示之手敕乃上時秦晉二王欲上城家彥曰二王降賊卽賊也賊安得上偕縉彥詣宮門復命不得入黎明城陷家彥投城下不死自縊于民舍遭賊焚殘一臂僕收其餘體焉刑部右侍郎孟兆祥交河人分守正陽門城陷嘆曰社稷已覆吾將安之自經門下子章明甫成進士兆祥揮之使去對曰君父死我何生爲乃投纆于父側兆祥妻呂氏章明妻王氏同日竝縊右副都御史施邦曜餘姚人當賊薄近郊語本兵張縉彥亟檄天下兵勤王弗省太息去城

陷趨長安門聞帝崩慟哭曰君殉社稷臣子可偷生哉
卽解帶自經僕救之復蘇恨曰是兒誤我賊滿街衢不
得還邸舍望門求縊輒爲居民所麾乃命僕市信石雜
燒酒卽途中服之血迸裂卒大理寺卿凌義渠烏程人
得帝崩信負牆哀號以首觸柱流血被面門生勸無死
義渠厲聲曰當以道義相勗何姑息爲揮使去據几端
坐取平生所好書盡焚之曰無爲賊手污也服緋正笏
向闕拜復南向稽首作書辭父自繫奮身絕吭死太常
少卿吳麟徵海鹽人分守西直門門當賊衝賊詐爲勤
王兵求入中官欲納麟徵不可以土石塞其門募死士

日知錄卷之十一
二
緹城襲擊多斬獲及城陷入道旁祠作書訣家人令歛
用角巾青衫覆之單衾以志哀痛自經死先是薊督王
永吉請撤甯遠吳三桂兵守關門帝下其議麟徵獨疏
數百言力贊之不決及烽火徹大內帝始悔不用麟徵
言城破時八門皆啟惟西直門堅塞不能通後發掘乃
開右庶子周鳳翔山陰人都城陷傳帝南幸鳳翔趨入
朝見魏藻德陳演等羣入而自成方擁御座鳳翔至殿
前大哭急從左掖門出賊亦不問歸至邸作書辭二親
題詩壁間自經死左諭德馬世奇無錫人當城陷世奇
方早食投箸起問帝安在東宮二王安在或言帝已出

城或言帝已崩或又言東宮二王被執世奇曰吾不死
安之其僕曰如太夫人何荅曰正恐辱太夫人耳作書
別母蕭衣冠捧所署司經局印望闕再拜自經妾李氏
朱氏竝先縊死左中允劉理順杞縣人畿輔告警理順
疏陳作士氣矜窮民簡良吏定師期信賞罰招脅從六
事及賊犯京師急守卒缺餉理順詣朝房語諸執政急
請帑衆唯唯理順太息歸捐家貲犒守城卒僚友問進
退正色曰存亡視國尚須商酌耶城陷理順與妻萬氏
妾李氏子孝廉竝婢僕數人闔門縊死羣盜多中州人
聞其死入唁曰此吾鄉之劉狀元也居鄉多厚德何遽

死羅拜號泣而去檢討汪偉休甯人城陷語其繼妻耿氏善撫幼子耿泣曰我獨不能從公死乎因以幼子屬其弟衣新衣上下縫引刀自刎不殊復投繯死偉欣然

曰是成吾志移其尸于堂援筆書某日某官汪某同繼

妻耿氏死節處于壁間乃自經

攷異綬寇紀畧言偉與耿氏飲酒題詩于壁其

益也耿在左乃復下曰不可亂夫婦之序其從容如此此與明史本傳所記小異增識之太僕寺丞

申佳允永年人閱馬近畿聞居庸陷嘆曰京師必不守

矣貽子涵光書曰吾受國恩當以死報城陷冠帶辭母

策馬至王恭廠將投井從者持之下馬旁見灌畦巨井

急躍入僕呼號欲出之佳允亦呼曰告太夫人有子作

忠臣毋過傷也遂死給事中吳甘來新昌人帝嘗詰戶部餉額甘來曰臣科與戶曹表裏餉可按籍稽也臣所慮者兵聞賊而逃民見賊而喜恐非無餉之患而無民之患宜急輕賦稅收人心帝領之及聞變疾走皇城不得入返作絕命詞盡取疏草焚之曰賊寇縱橫徒揚議論無益毫末留之罪彌大正衣冠北向投縋死御史王章武進人與給事中光時亨守阜城門賊入城時亨欲要章走章曰事至此猶惜死邪時亨曰死此與士卒何別入朝訪上所在不獲則死死未晚也章從之與時亨並馬行俄賊突至疾呼下馬時亨倉皇下跪乞降章揚

鞭不顧叱曰吾視軍御史也誰敢犯賊刺章股墮章罵賊不絕口賊怒攢槊刺殺章而去抵暮其僕覓尸猶一手據地坐張口怒目如此賊狀御史陳良謨鄭人母老已未有子而妾時氏方娠乃謂之曰吾且死汝幸有身急歸父母家時泣曰公殉國妾不當殉公邪倘不幸有他不如無子良謨曰能如是乎時乃先就縊時京師人年十八侍良謨才百三日耳時既死良謨望闕拜亦自縊兵部郎中成德霍州人城破不知帝所在既趨至午門見尙書張縉彥自賊所出德以頭觸縉彥胷且詈之俄聞帝崩痛哭持雞酒犇奠梓宮前觸地流血賊怒刃

脅之不爲動。奠畢歸家，有妹年二十餘，因家難未嫁。德顧之曰：「我死，汝何依？」妹請先死，德稱善，哭而視其縊。繼室霍氏請繼之，德痛不及視，入別其母，哭盡哀而出。自縊。母見子女及子婦皆死，亦投縊死。先是懷柔城陷，德父文桂遇害，家屬盡沒。妻劉以德被逮，追賊憂悸死。至是，又闔門殉焉。吏部員外郎許直如臯人，賊薄都城，約同官出貲餉，士爲死守。計及城陷，傳帝南狩，直將往從。見賊騎塞道，輒返曰：「四方兵戈，駕將焉往？」已知帝崩，一痛幾絕。客以七十老父爲解，直曰：「不死辱及所生，乃作書寄父，賦絕命詞六章，闔戶自縊死。」兵部員外郎金鉉

武進人初聞大同陷疏曰宣大京師北門大同陷則宣
府危宣府危則大事去請急撤回中官杜勳專任巡撫
朱之馮勳二心僨事之馮忠懇可屬大事不報及京城
破痛哭急趨入朝見宮人狂奔出知帝已崩解牙牌北
向四拜投金水河從者力挽之怒奮臂躍入死母章妻

王弟錄竝殉焉

致異自范景文以下二十人據明史本
傳言大清世祖章皇帝表章

前代忠臣所司以范景文至金鉉賂

七十畝建祠致祭且予美謚故明史

命有司各給地七十畝建祠致祭且予美謚故明史

傳中特列范景文以下二十人別爲兩卷而御史陳純
德亦在南渡正祀之內蓋福王時純德入正祀而孟兆
祥子章明則以其父故改入附祀之首故亦止二十人
也今按正祀附祀文武諸臣皆福王南渡時所定有被
拷掠死而入祀者有實係被執不屈死而未邀贈卹者
故其去取不足據重修三編修于乾隆勝朝殉節諸臣

錄之後所記殉難諸臣爲得其
實今自二十人以下悉據書之
御史陳純德巡按山西
攷異三編作巡撫蓋按
字之誤也今据本傳
力陳抽練弊還朝提督畿輔學

政出按部都城陷賊下令百官以某日入見衆攝純德

入還邸慟哭遂自經

攷異按順治時贈諡二十人不及
陳純德者以野史有受夾死之說

而疑之證之明史本傳實
無其事今書于二十人後
御史趙謨巡視中城城陷罵

賊被殺

攷異趙謨据三編增入原進簽內言其北都殉
本朝乾隆四年九廷臣請賜諡忠愍前

此輯覽已載今補入按輯覽三編皆有趙謨不知殉
節錄何以遺之且錄中通諡四等無忠愍似專諡也工

部員外郎王鍾彥守廣甯門守將開門納賊鍾彥被執

不屈死削籍吏部尚書李遇知城陷方自縊被賊執不

屈死一門死者七人妾王氏先縊死郎中周之茂需次

都下賊搜得之迫使跪不屈折其臂而死順天通判張
凝和分守北門城陷死御史俞志虞聞城陷不食梓宮
出東華門往哭自縊于新昌會館員外郎甯承烈管太
倉銀庫城陷自經于官廨范方被繫不屈死中書宋天
顯被賊執逼書偽詔抗罵觸階死光祿寺署丞于騰雲
聞賊至語其妻曰我爲朝臣汝亦命婦不可汙于賊竝
服命服自經死濮州知州馬象乾順天人罷居里城陷
率妻及子女五人死中書王永隆遇變不食死郎中葛
凝秀北向投繯死寇可教罵賊死主事楊會英被執引
頸就刃死沈邱知縣李昌齡被誣下獄賊入城釋之不

食死太醫院吏目楊元與妻楊氏同縊死郎中張樞芳
員外張三傑皆被執不屈死主事陳貞達都御史于廷
子也罵賊死順天經歷施溥方升任樂亭知縣未行城
陷仰藥死博樂知縣徐有度罵賊死平涼同知郭寅與
其二子皆不屈死家居故萊陽知縣徐兆任與妻張氏
及幼子同縊死兵馬司指揮姚成自縊死妻袁氏子逢
元及一僕俱殉焉一時勲戚之死事者劉氏一門爲首
新樂侯劉文炳者帝生母孝純皇太后之弟子也文炳
素與宛平太學生申澁然布衣黃尼麓講明忠義賊攻
西直門急尼麓踉蹌告文炳宜自爲計時太后母瀛國

夫人尙在文炳與其母杜氏計太夫人篤老不可俱燼請匿之湛然家杜氏曰太夫人得所我與若妻妹俱死耳命侍婢結縵于樓上作七八縵家僮積薪樓下尋遣老僕鄭平迎李氏吳氏二女歸曰吾母女同死此復何憾文炳奉密召入見誓効死出聞外城陷馳至崇文門殺賊數十人馳歸第母杜氏文炳妻王氏及兩妹已先自縊死家人正焚樓火烈不得入時文炳叔左都督劉繼祖瀛國公次子也守東安門不克歸至後園與文炳遇相約投井文炳忽止曰戎服不可見皇帝易以巾幘繼祖大呼皇帝數聲同入井死文炳弟左都督文耀守

永定門見外城破突出至渾河聞內城破復入見第已
焚大哭曰文耀未死以君與母在耳今至此何生爲遂
覓文炳死所大書版井旁曰左都督劉文耀同兄文炳
畢命報國處亦投井死繼祖妻左氏妾董氏李氏亦登
樓自焚死闔門死者四十二人文炳季弟文照奉母命
留侍太夫人遂逃去而申湛然以匿瀛國太夫人爲賊
拷掠終不言體糜爛以死次則駙馬都尉鞏永固尙樂
安公主都城陷時公主已薨未葬永固與文炳誓以死
報乃以黃繩縛子女五人誓柩告曰此帝甥不可汙賊
手舉劔自刎闔家焚死宣城伯衛時春穎六世孫也掌

後府京師陷懷鐵券闔門十七人皆赴井死惠安伯張慶臻騏之後裔掌都督府都城陷召親黨盡散貲財闔家自焚死彰武伯楊崇猷信之後裔城陷自經死甯遠伯李尊祖成梁之孫遇害死彭城伯張光祖麟十四世孫定遠侯鄧文明甯河王愈十一世孫鎮遠侯顧肇迹夏國公成十一世孫西甯侯宋裕德鄆國公瑛九世孫清平侯吳遵周梁國公成八世孫陽武侯薛濂鄆國公祿九世孫恭順侯吳汝徵邠國公永成七世孫新城侯王國興熹宗母孝和太后弟昇之子皆以城破殉節

據三編所載烈威侯伯自劉文炳以下十三人駙馬一人而劉繼祖別入之武職中質實言繼祖與文炳同赴

非死且係蘇國公次子而太后之母弟今竝入之勲戚
下若緩寇紀畧所載成國公朱純臣武定侯郭培民承
康侯徐錫登懷甯侯孫維藩新建伯王先通安鄉伯張
光燦皆在南渡附祀之列三編蓋擇其確者書之見後
卷

武臣世職之死事者則左都督劉岱以外戚世襲職
居京師城陷全家自焚死副總兵賀珍守平則門賊至
率千騎力戰陷陣死都督僉事賀讚總兵虎臣子賊薄
京城迎擊爲亂箭射死鎮撫司僉事李若璉分守崇文
門城陷自縊死都指揮僉事魏師貞服命服拜闕自焚
死參將高鏗闔門焚死指揮同知許達允尙書進五代
孫罵賊不屈死都督方履泰南和伯一元子自刎死千
戶李國祿自縊死指揮同知李若珪作絕命詞自經死

指揮使蕭偲以父如薰蔭在職死虎賁左衛參軍李正

光闔門死指揮馬國城

城殉節錄作城

世襲指揮張養所都指

揮梁清宏指揮張國維皆不屈死指揮高甲同妻許氏

媳王氏女高氏弟婦劉氏姪女高氏同自經死指揮劉

一松同妻王氏自縊死千戶高文采一家十七人皆自

殺攷異三編京師陷日中所載殉難諸臣皆連保定書

事者今分書于壬子陷保定下惟副總兵賀珍据殉節

錄守平則門陣沒又錦衣千戶高文采一家十七人死

殉節錄及諸書所載同輯覽亦次于勲戚之末而三編

者別記于其以布衣殉節者湯文瓊爲最著瓊石埭人

是歲之末

授徒京師見國事日非數獻策闕下不報京師陷慨然

語其友曰吾雖布衣獨非大明臣子邪安忍見賊弑君篡國乃書其衣衿曰位非文丞相之位心則文丞相之心投繯而卒後李自成得其衣帶語以責陳演遂斬演于市時都城布衣盡節者又有范箴聽楊鉉李夢禧張世禧之等不下百餘人箴聽聞賊至置一棺偃卧其上絕食七日死鉉善寫真城陷攜二子赴井死夢禧與妻杜二子二女一婢俱縊死世禧亦與二子懋賞懋官俱自經死又有周姓者悲憤槌胸嘔血數升死而柏鄉人郝奇遇居京師聞變謂妻曰我欲死難汝能之子妻曰能遂先死奇遇瘞畢服藥死

攷異據計氏北畧所載文臣有中書舍人滕文所阮

文貴皆投御河死順天府推官劉有灝聞城破縊死又
順天教官五人同縊明倫堂佚其姓名陽和衛經歷毛
維張命巡城大罵賊夾殺並柳死又經歷張應選投御
河死殉節錄言應選之妻妾子女同殉武職有百戶王
某者周鍾寓其家王勸鍾死不從遂自縊勳戚有周鏡
者官東宮侍衛聞賊至母妻一門俱自盡或云鏡卽周
奎之姪也又有順天民李小槐聞難視妻杜氏三子一
女一婢以次縊畢始自縊又武僚之僕某見僚索吉服
將朝李自成苦諫叩頭出血僚不聽遂不食而卒皆三編
明史忠義傳所不載者附識于此 帝崩之
前夕宮女皆踰牆夜出有宮人魏氏者臨御河大呼曰
有志者當自爲計遂投河死頃刻間從死者二三百人
宮人費氏自投簪井中賊勾出見其容爭奪之費給曰
我長平公主也羣賊不敢逼擁見自成自成命中官審
視非是以賞部將羅某費復給羅曰我實天潢羨難苟

合將軍宜擇吉成禮羅喜置酒極歡費懷利刃伺羅醉
斷其喉立死因自呼曰我一弱女子殺一賊帥足矣遂
自刎自成聞大驚命收葬之而熹宗懿安皇后者亦尋
自縊死夜異懿安之死明史三編無異詞賀宿懿安事
畧以時有盲皇后之任氏爲大清賜死于
懿安無涉也京師之陷李巖
保護懿安令自盡此爲確證

是日午李自成羶笠纓
衣乘烏駁馬入承天門僞大學士牛金星僞尙書宋企
郊等騎而從太監王德化等先迎候于德勝門隨而入
自成登皇極殿下令大索帝后蓋時未得帝崩信又傳
駕已南幸也時諸監有獻太子及永定二王者俱送劉
宗敏宅宅卽戚畹田宏遇第也令勲戚文武百官俱于

二十一日朝見戊申添設守門兵及放馬兵入城 己酉昧爽成國公朱純臣大學士魏藻德陳演率文武百官入賀皆素服坐殿前自成不出羣賊爭戲侮爲椎背脫帽或舉足加頸上相笑樂百官懾伏不敢動演首勸進不許封太子爲宋王放刑部錦衣繫囚五品以下張若麒等自成自居西安時建置官吏至是益盡改官制六部曰六政府司官曰從事六科曰諫議十三道曰直指使翰林院曰宏文館太僕寺曰驗馬寺巡撫曰節度使兵備曰防禦使知府州縣曰尹曰牧曰令召見朝官自成南向坐金星宗敏企郊等左右裸坐以次呼名分

三等授職自四品以下少詹事梁紹陽楊觀光等無不

汙僞命三品以上獨用故侍郎侯恂自是降者無不悚

息待命賊又編排甲令五家養一賊大縱淫掠民遭荼

毒縊死者相望 庚戌得先帝遺弓于萬歲山亭李自

成命以宮扉載出盛柳棺置東華門外百姓過者皆掩

泣是日殺成國公朱純臣先是帝臨崩有手敕令百官

俱赴東宮行在蓋上欲託東宮于純臣令總督諸軍輔

太子不果行至是自成得殊諭于文淵閣案上卽命收

繫純臣日中被殺並其弟及從子皆誅之籍其家

致異朱純

臣未追贓而遽殺故諸書皆系之二十二日甲乙核真

畧所謂收繫最先慘死最速者是也然力辨其無勸進

之事此則士聰爲已故諱言之耳野史謂其與張縉彥
迪門拜降其有無不足辨然初次勸進在己酉百官朝
見之時純臣實班首也陳演特閣臣耳豈有不列勳戚
公侯寺之名而自成金星輩許之乎士聰謂初次勸進
在二十六日則成國已死又言逆賊勸進事誠有之乃
賊營見在之僞官非京城從賊之降官不知二十一日
百官朝見自成勸進乃必有之事何待陳演之首創其
謀若謂純臣不在勸進之列實不敢信也意當時八百
餘人必有大半列名者特勳戚首純臣閣臣首陳演耳
純臣以總督諸軍輔太子之手敕遂首殺之較之李國
楨輩被刑夾而死者差爲不受辱而南渡後乃列之附
庶武臣之首且更以李國楨入之正祀之列外謬甚矣
辛亥爲先帝易梓宮與周皇后梓宮同移殯于佛菴

中 是日百官降者按次唱名自成拔九十二人送僞
更政府宋企郊分三等授官俄傳僞旨自勳戚大臣及
文武百官八百餘人悉囚繫送僞都督劉宗敏營中拷

夾責賂賂時有國子祭酒孫從度住金台會館病甚臥
床有偽將羅姓乘馬進館徑入內室其妻孫氏罵之羅
遂以鉄索繫孫竝昇從度過已寓從度尋以拷訊斃乃
索氏貲凡七授百敲十指俱斷招得窖金七千兩獻自
成自成駭曰一翰林富乃至是耶于是降官之被拷掠
者自此始攷異此据核真畧而計氏北畧及甲乙彙編
皆在是日蓋自成始送諸降官于偽吏政分
三等授官會賊將羅某送所得孫從度窖金七千乃動
追贓之念于是所授之官悉被囚繫實始于此今据書
之壬子保定府陷先是賊黨劉方亮陷真定各郡縣

迎降相繼人情益洶洶保定同知邵宗元碭山人方攝
府事亟集通判王宗周推官許曰可清苑知縣朱永康

衛指揮劉宗嗣

攷異宗明史本傳及諸書皆作忠蓋三編後改也殉節錄亦作劉宗嗣今從之

及鄉官故光祿少卿張羅彥故工科給事中尹洗等議城守時知府何復平度人以前月由員外擢守保定閭警兼程馳入城宗元授以印復曰公部署已定印仍佩之我相與僇力可也乃謁文廟與諸生講見危致命章詞氣激烈講畢登城分守都城陷之次日賊使投書誘降宗元手裂之明日賊大至絡繹三百里有數十騎服婦人衣言所過百餘城皆開門遠迎不降卽屠且京師已破爲誰守城上人聞之髮豎背裂賊環攻累日宗元等守甚堅賊稍稍引却督師李建泰率殘卒數百輦餉

銀十餘輜初至定興城門閉不納留三日攻破之管其
長吏遂抵保定叩城求入宗元等不許建泰舉敕印示
之宗元等曰公荷聖恩御門賜劍酌酒餞別今不仗鉞
西征乃叩關避賊邪建泰怒厲聲叱呼且舉上方劍脅
之或請啟門宗元曰脫賊詐爲之若何衆以御史金毓
峒嘗監建泰軍識建泰推出視之信乃納之建泰入賊
攻益厲建泰倡言曰勢不支矣姑與議降書牒迫宗元
用印宗元抵印厲聲曰我爲朝廷守土義不降欲降者
任爲之大哭引刀將自刎左右急止之皆雨泣羅彥前
曰邪說勿聽速擊賊復乃自起焚西洋巨礮火發被燎

幾死賊攻無遺力雉堞盡傾俄賊火箭中城西北樓復
遂焚死賊又焚南郭門守者多散南城守將王登洲縋
城出降賊蜂擁而上建泰中軍副將郭中杰等爲內應
城遂陷宗元及中官方正化不屈死建泰率曰可永康
出降宗嗣分守東城城將陷召女弟適楊千戶者歸與
妻毛氏子婦王氏同處一室俱以弓弦縊殺之復登城
拒守城破被執怒詈奪賊刀殺三人賊厲至剗目劓鼻
支解死保定知縣楊珮陞鄧州未行寇入死之據殉節錄補

一時武臣死事者守備則張大同與子之坦力戰死指
揮則文運昌劉洪恩戴世爵劉元靖呂九章呂一照李

一廣中軍則楊儒秀鎮撫則管民治千戶則楊仁政李
尙忠紀勳趙世貴劉本源侯繼先張守道百戶則劉朝
卿劉悅田守正王好善強忠武王爾祉把總則郝國忠
申錫皆殉城死復有呂應蛟者保定右衛人厯官密雲
副總兵謝事歸賊至總監正化知其能延與共守晝夜
不懈城破短兵鬥殺十餘賊而死一時鄉官之死事者
則張羅彥一門爲首羅彥兄弟六人兄羅俊以十六年
秋舉進士弟羅輔亦以是年舉武進士羅士早卒諸生
羅善羅喆當賊逼京師羅彥兄弟家居與邵宗元歃血
盟誓死守總兵官馬岱謁羅彥曰賊分兩道一出固關

一趨河間吾當出屯蠡縣扼其衝先殺妻子而後往其
城守悉屬公羅彥曰諾諾旦岱果殺妻孥十一人率師
去羅彥等糾鄉兵二千分陴守羅俊守東城羅彥西北
羅輔爲游兵公廩不足出私財佐之賊遣騎呼降羅俊
顧其下曰欲降者取我首去劉宗嗣挺劍曰有不從張
氏兄弟死守者齒此劍怒目髮上指聞者咸憤厲守益
堅賊爲引却已聞京師陷衆皆哭北向拜又羅拜相盟
誓而賊攻益急城中多異議羅彥謂宗元曰小民無知
非鼓以大義氣不壯乃下令人綴崇禎錢一枚于項示
戴主意賊以羅彥主謀呼其名大詬且射書說降羅彥

不顧賊死傷多攻愈力而李建泰親軍爲內應城遂陷
羅俊猶持刀斫賊刀脫兩手抱賊齧其耳血淋漓口吻
間賊益衆大呼我進士張羅俊遂遇害羅彥見賊入急
還家大書官階姓名于壁投繯死于晉與羅俊子仲竝
赴井死時羅善佐兩兄守城城將陷兩兄戒勿死羅善
曰有死節之臣不可無死節之士與妻高氏攜三女同
投井死羅輔多力善射晝夜乘城射必殺賊城破連射
殺數人矢盡持短兵殺數人乃死羅士妻高氏守節十
七年至是亦自經死惟羅喆從水門走免妻王氏亦縊
死羅俊伯母李氏罵賊死羅彥妻趙氏二妾宋氏錢氏

及晉妻師氏當危急時竝坐井旁以待賊入皆先羅彥投井死惟趙氏不沈家人出之再入復如故有抱晉之子至者曰夫人死將令張無後乃匿空舍中潛出水門免而羅輔妻白氏在母家聞難欲死侍者止之給以汲井推幼女先入已從之羅俊再從子震妻徐氏巽妻劉氏亦投井死一門死者凡二十三人方建泰之出師也金毓峒爲監軍御史方馳赴山西抵保定賊騎已逼而毓峒本保定衛人遂入城與邵宗元共守毓峒守西城散家貲千餘金犒士其妻王氏亦出簪珥佐之方京師陷賊射書說降衆頗懈毓峒厲聲曰正當爲君父復讐

敢異議者斬懸銀牌令擊賊者自取衆爭奮斃賊多城
陷一賊挽毓峒往謁其帥且罵且行遇井推賊仆地自
墮井死妻王聞之卽自經其從子振孫有勇力以武舉
佐守城賊至衆皆散獨立城上大呼曰我金振孫前日
殺數賊魁者我也羣賊支解之振孫兄肖孫子婦陳氏
與侍兒桂春亦投井死肖孫匿毓峒二子爲賊擄掠無
完膚終不言二子獲免同時守城殉難者邠州知州韓
東明武進士陳國政赴井死平涼通判張維綱舉人張
爾翬孫從範不屈死舉人高經負母避難遇賊求釋其
母母獲釋而經被執乘間赴水死貢生郭鳴世寢疾聞

城陷整衣冠端坐賊至持棒奮擊而死諸生王之珽先
城陷一日置酒會家人飲達旦城陷偕妻齊氏及三子
二女入井死諸生韓楓何一中杜聯芳王法等二十九
人布衣劉宗向田仰名劉自重等二十人或自經或溺
或受刃皆不屈死婦女殉節者一百十五人他若尹洗
見及舉人劉會昌貢生王聯芳以城陷次日爲賊收獲
亦不屈死賊揭其首于竿書曰據城抗節惡官逆子見
者飲泣是役也城內屠赤一空尸枕藉填溝壑偽官
舉之三日不能盡蓋闔郡殉之云

夜異三編于甲申三
月明亡故書保定之

事皆從畧其殉難之何復邵宗元金毓峒方正化張羅
俊附見蔣德璟罷目中其他如呂應蛟文運昌劉洪恩

張世爵劉元靖呂九章呂一照李一廣張羅彥韓東明
張維綱等皆均載于京師陷日中而特書其守保定死
于質實中惟劉宗嗣則但云分守東城尹洗則但云守
西城又如楊儒秀張大同于之坦皆但以守城書之未
及分析今所載悉据明史何復張羅俊金敏嗣三人傳
詳記其事之本末及殉難之文武官紳而城陷日分則
据北畧及綏寇紀畧皆云二十四日與明史京師城陷
之次日賊遣使說降又攻之累日者合惟核真畧謂李
建泰以二十一日被押入京師日分已誤又謂賊屢諭
不降自刎又不死者尤臆說也明史成最後凡忠義傳
所載皆擇其確者書之若保定之役据綏寇紀畧所記
同時有材官王尊義主簿沙潤民醫官呂國賓王鏞王
之瑄皆被殺並見殉節錄文學有杜日芳王欽馮澤王
允嘉吳杖韓廷珍楊善馨何光岳韓紹淹顏學曾王敬
詞王繼柱趙居晉王昌祚孫誠趙世珩楊拱辰王建極
阮積學王世疇王致中周之翰等意卽明史所謂二十
九人之數者也又有儒士劉士璉不屈死王景曜罵賊
破射死黃棟火箭燒樓死義民則劉宗向等三人外又
有楊強子刃賊力屈自刎死張加善不屈縊死鄭國甯
擊賊不中李懋倫罵賊王捷張智劉養心朱永甯胡來

獻胡得銀俱以拒賊被殺意卽明史二十人之數者也
 又與尹洗等三人被執不屈死者有諸生王世琦又與
 郭鳴世同死者有諸生賀誠而韓東明之子仲淹亦繼
 東明討賊陞城死若婦女則又有金振孫妻王氏劉宗
 嗣女劉氏文運昌妻宋氏張爾鞏妻唐氏何一中妻趙
 氏韓楓妻王氏田仰名妻曹氏劉自重妻羅氏以上皆
 据保定儒士陳僖所輯甲申上谷紀事而僖又自爲陳
 氏節傳言僖王母張氏母楊氏妻常氏妹文學金瞿妻
 陳氏俱于二十三日同辭家廬集後園城陷張捧誥命
 楊一手挽媳常一手挽女並侍婢四人並周歲弟仔甫
 同入井死一門殉者九人又爲高氏節傳言諸生高植
 妻王氏舉人高桂妻劉氏請于公姑賊入同縊死其他
 縊死者則有錦衣千戶賀誥妻霍氏等十一人井死者
 有進士王延禔妻張氏等五十二人又三編賈實楊儒
 秀妻杜氏投水死凡此卽傳中所謂一百十五人之數
 者也惟馬岱殺其妻子率師出据紀畧言劉方亮旣去
 留僞將張洪收諸下邑得岱于蠡縣自刎不殊洪傳而
 致之自成以將斃故得脫後爲僖不知所終今並附識
 之以俟攷。又按殉節錄保定諸生有劉士廉周之韓
 王建基王繼桂貴一作同母及妻張氏王嘉印王祚昌

讀王性竝何光岳之妻師氏阮積學
之妻何氏皆紀畧所遺者茲識之

癸丑偽禮政府

鞏精示隨駕百官率耆老上表勸進甲寅偽旨今禮政

府諷吉舉行未幾而山海關之報至不果是日陞遷各

降官四品以下百餘人

致無諸書皆以二十六日爲勸進之始卽甲寅也勸進之語野

史皆言始于朱純臣陳演則二十一日入朝時也其時遺弓未得遷蹕方傳諸降臣卽喪心昧良亦無暇及此諒演等勸進不過列職名而已至是始令上表而所云百官者卽指李國楨陳演之等楊士聰甲乙核真畧謂隨駕諸臣乃呼文之牛金星武之劉宗敏勸進大事宜屬之佐命之臣豈肯以亡國纍囚等之乎此蓋諱言已在百官之列而簡詞以欺人耳永樂之入金川門其時叩馬勸進者何一非建文亡國之臣不聞卽福朱能等之預其列也況鞏精早已爲自成僞官又安敢以政府之示臨之金星宗敏者則所謂百官耆老非指亡國之臣民而何今仍

始開拷掠追贓閣臣責餉十萬部院

據野史分書之

錦衣七萬以下科道吏部五萬以下翰林二萬以下部屬以下各以千計勲戚則金盡輒殺之 乙卯平西伯吳三桂自山海關乞師于我

大清初三桂奉詔入援過關至豐潤聞京師已陷猶豫不敢前其父襄提督京營自成脅襄以書招之三桂欲降先是三桂嘗就嘉定伯周奎飲悅歌女陳沅以千金購之會三桂以邊警行奎送沅于襄所至是爲賊將劉宗敏掠去三桂聞之憤甚時自成已遣降將唐通白廣恩率兵二萬東攻灤州三桂疾馳歸山海關襲破賊將降其衆八千自成怒親部賊十餘萬執襄于軍東攻山

海關以別將從一片石越關外三編實實一片石在永平府撫甯縣東北山海關北七十里有關城城東爲北門水口三桂懼遣副將楊坤游擊郭雲龍來乞師我

大清

世祖章皇帝命睿親王多爾袞帥師行 丙辰遷帝后

梓宮于昌平州州之士民率出錢葬之田貴妃墓內斬

蓬藿而封之不能成禮

攷異天壽山在昌平莊烈之葬田貴妃墓正史野史無異詞而

揚土聰言昇朝如殯皆葬金山不葬昌平不知萬貴妃所葬亦昌平也金山在順天宛平縣之西北高

清兵五月入京師改葬莊烈帝后陵曰思陵昌平密邇京師豈有不查明確實者顧亭林昌平山水記載思陵

本末甚悉然則核真之說亦應度耳越兩月我

大清入京師始以帝禮改葬令臣民服喪三日謚曰莊烈皇帝陵曰思陵

明史贊曰帝承神燾之後慨然有爲卽位之初沈機獨斷刈除奸逆天下想望治平惜乎大勢已傾積習難挽在廷則門戶糾紛疆場則將驕卒惰兵荒四告流寇蔓延遂至潰爛而莫可救可謂不幸也已然在位十有七年不邇聲色憂勤惕勵殫心治理臨朝浩歎慨然思得非常之材而用匪其人益以債事乃復信任宦官布列要地舉措失當制置乖方祚訖運移身罹禍變豈非氣數使然哉迨至大命有歸妖氛盡

掃而帝得加謚建陵典禮優厚是則

聖朝盛德度越千古亦可以知帝之家難而不辱其身
爲亡國之義烈矣

夏四月辛酉李自成焚太廟神主

攷異據核真畧在是日竝無遷太祖主事

詳后

卷 王申我

大清睿親王師次翁後得吳三桂遣將致書略曰三桂
以蛟負之身荷遼東重任今以甯遠右偏孤立之故令
棄甯遠而填山海思欲堅守東陲而鞏固京師也不意
流寇逆天犯闕以彼狗偷烏合何能成事乃京城人心
不固奸黨開門納款先帝不幸九廟灰燼今賊首僭稱

尊號擄掠婦女財物罪惡已極天人共憤三桂受國厚恩欲興師問罪以慰人心奈京東地小兵力不支特泣血求助乞念亾國孤臣之言速選精兵三桂自帥所部合兵以抵都門滅流寇于宮廷示大義于中國乞王轉奏王卽遣使報書略言聞流寇攻陷京師明主慘亾不勝髮指用是率仁義之師沈舟破釜誓不返旌期必滅賊出民水火伯今遣使致書深爲嘉悅卽當統兵前進伯雖向守遼東與我爲敵幸勿以前故尙復懷疑若率衆來歸必封以故土爵爲藩王國讐可報身家可保先是李自成已于十三日挾太子諸王東行僞將唐通出

一片石三桂請速進兵疾馳至沙河三桂報賊已出邊
立柵寨戊寅

大軍迎擊大敗通兵于一片石己卯師至山海關三桂
開關出迎王令三桂兵繫白布爲識使之先驅遂入關
時自成率步兵二十餘萬陣于關內自北山亘海

大兵布陣不能橫及海岸乃令軍士鱗次布列對賊陣
尾伺其情奮擊之且戒勿越伍違節制陣既列三桂居
右翼之禾先悉其衆搏戰圍開復合戰良久

大清從三桂陣右突出衝賊中堅萬馬奔騰飛矢雨墮
天大風沙石飛走擊賊如電自成方登高岡觀戰知爲

大清兵急策馬下岡走賊衆大潰自相踐踏死者無算
僵屍徧野溝水盡赤自成奔永平

大兵追之三桂先驅至永平自成使降臣王則堯詣三
桂議和許送太子二王皆僞也三桂送則堯于睿王軍
中斬之益進兵自成乃殺其父襄走京師尋又殺襄家

屬三十四人

敗異野史言唐通既敗乃送定王于軍中
三桂云必得太子而後已又言山海關之

敗自成復遣王則堯張若麒請和送出太子其後三桂

至永平奔定王專擁太子欲護之入都以其後三桂

不許乃送太子于高啟潛或云啟潛又送之民間皆誤

也自成西奔挾太子二王以行則聖武記所謂許送太

子二王爲僞者是也三編所記皆參本朝實錄書

之但有挾太子二王西行無送三桂軍中之語其爲傳
聞之失實可知矣今據三編參聖武記東華錄書之
諸書記三桂破賊于四月辛酉者辛酉爲初四日距乞

師僅六日蓋三柱襲破自成之別將非唐通也通之敗
于一片石乃合大清兵敗之東華錄書之戊寅即
聖武記所云二十一日者是也明日又合兵敗之山海
關自成乃奔永平野史以爲戊寅奔永平者亦誤今日
分皆據東華錄聖武記 癸未自成奔京師初京師陷自成登殿

受朝賀一日升御座突見神人長數丈手劍怒視座下
龍爪鬣俱動自成恐亟下鑄金壘及永昌錢皆不就及
保定之陷李建泰降畿內郡縣悉附山東河南徧設官
吏所至無違者自成以爲真得天命諸臣自牛金星以
下三次勸進尋以東兵故且令誡吉肆儀至是將西奔
乃行之丙戌僭僞號于武英殿追尊七代皆爲帝后立
妻高氏爲皇后自成被冠冕列仗受朝命金星代行郊

天禮是夕焚宮殿及九門城樓悉鎔所拷索金銀及宮中帑藏器皿鑄爲餅每餅千金約數萬餅載以騾車丁亥晦詰朝挾太子二王西奔長安而使僞將軍左光先谷可成爲後衛又勒諸瑠悉取其金玉珠寶及出宮令羣賊各執守城白楊杖逐之不分貴賤皆號泣徒跣敗面流血走出長安門外 闖賊之責餉追賊也灼肉折脛備諸慘毒有拷夾而死者有拷夾完賊而復殺之者勲戚自朱純臣被殺後次及襄城伯李國禎賊之入也國禎解甲聽命尋以賁賄不足被拷折踝自縊死其妻爲賊掠褫盡底衣抱之上馬大呼此襄城伯夫人其辱

尤甚定國公徐允禎被殺英國公張世澤並其妻妾俱拷掠死閣臣陳演首輸銀四萬錦衣駱養性輸三萬得免夾羈候及自成將東禦吳三桂慮諸大臣爲後患乃首誅演及魏藻德藻德輸萬金賊以爲少酷刑五日夜腦裂死方藻德被掠遇馬世奇家人泣曰吾不能爲若主今求死不得矣至是果驗方岳貢邱瑜拷掠完賊已被釋及自成殺演等令監守者竝殺二人各予以纒俱自縊死其他自部院大臣以及詞科部僚之等死者辱者不可勝計然亦有悔憤而自盡者故贈太常卿魏大中之次子學濂中癸未進士擢庶吉士是年賊逼京師

學濂與同官吳爾堦慷慨有所論建大學士范景文以

聞先帝特召見兩人將任用無何京師陷學濂不能死

受賊戶部司務職噴其家聲已自成西犇學濂將出自

慚遂賦絕命詞二章自縊死致異以上被殺之勲戚閭臣皆據明史本傳書之若

野史所記李國禎被執不跪及送先帝葬後慟哭自刎

而死此皆南渡後劉孔昭等入之正祀武臣之首因披

拾其事以爲勲戚殉難之尤烈者然當純臣被殺國禎

同時執至如其不降豈能俟之十日後聽其逍遙送葬

歸而自刎者况襄城業已被執又焉得有昌平送葬之

事明史刪此一段是也大氏國禎之死在殺陳演魏藻

德之前明史以爲被拷折踝自縊而死者爲得其實藻

德輸贖萬金在四月朔日然則酷刑五日而死者則初

六日也陳演以十二日被殺則自成東行之前一日方

岳貢印瑜之死又在其後證之核真畧所記亦同惟魏

學濂之死野史所記亦未足據然當自成西走學濂可

以逃免而明史特記其死于帝殉社稷之後四十日則

其死也毋亦一念之悔懼貽先人之羞爲門戶之玷乎純臣之死最先學濂之死最後今並表而出之

甲申三月之變有家居聞難而殉節者有里居擊賊而遇害者兵部侍郎王家禎解職家居長垣京師陷賊遣兵據長垣家禎自經死子元玠從之按察副使顧國縉上海人聞城陷不食死工部尙書何應瑞曹州人聞城陷不食死萊州推官張力家居東明聞都城陷偕邑人殺賊投僞官爲所執不屈罵賊死而是時諸生布衣之殉節者以吳縣許琰爲首琰有至性嘗刲臂療父疾爲諸生磊落不羈聞京師陷帝殉社稷大慟誓欲起義師討賊走告里薦紳皆不應端午日過友人出酒飲之琰

擲盃大詬曰我輩讀聖賢書今何時尚縱酒如平日耶拂衣徑去已聚哭明倫堂琰衰杖擗踊盡哀御史謁文庶猶吉服琰率諸生責以大義御史皇悚謝罪去及南都頒監國詔而哀詔猶未頒琰益憤痛趨古廡自經爲人所解乃步至胥門投于河潞王舟至拯之出既歸家人日文守不得死遂絕粒尋聞哀詔至卽庭中稽首號慟遂不復言以六月三日卒鄉人私謚曰潛忠先生其時諸生殉義者京師則又有曹肅蘭衛卿周讜李汝翼金壇則王明顙丹陽則王介休雞澤則殷淵肥鄉則宋湯齊郭珩王拱辰而肅之曾祖子登仕爲甘肅巡撫京

師陷肅與其兄遜弟敬祖母姜母張遜妻李肅妻周妹

持順弟婦鄧竝一門自縊死

攷選明史忠義傳言肅弟持敏而無遜敬二人名殉

節錄謂持敏卽遜字而肅之兄也

又傳言肅嫂李氏而

伏去肅妻周氏今以殉節錄證之則李卽遜妻而肅妻周遺之傳中又有弟婦鄧殉節錄亦遺之今攷肅有弟敬疑所謂弟婦鄧者卽敬妻也殉節錄成最後攷覈較

詳今參書之而附議于此衛卿止一幼女付其友自縊譙汝翼皆罵

賊不屈賊磔汝翼而殺譙明灝日夕慟哭家人解慰之

託故走二十里外投水死介休不食七日死賊破雞澤

淵謀起兵復之俄聞京師陷卽同諸生黃祐等密約山

中壯士誅賊所置僞官爲奸人所告被殺遠近悼之湯

齊拱辰亦以起兵討賊謀泄遇害

攷選以上殉難官紳皆据三編及明史忠

義傳而殉節錄另編甲申殉難諸臣爲一類紀載尤詳其通謚節愍卷內有廣靈知縣阮泰解職家居洛陽聞京師陷衣冠望闕拜不食死妻朱氏從之光祿監事胥自修江行人聞賊陷北都具冠服肅拜絕粒死湖南督學僉事周大啟長洲人甲申間變不食死猗氏知縣李樹聲岐山人歸賊陷京師遣人招之不從死濟南僉事劉世芳英山人聞京師陷慟哭嘔血死定海知縣朱懋華南陵人聞北京陷自縊死湖州司理李毓新嘉興人行取未赴甲申遇害次子禎先抱父尸死歸德通判張垣崇徐州人聞變以身殉商城知縣張國光大興人聞都城陷北向拜自經死儀封知縣陳三益山陰人寇陷都城僞使至同官勸出迎碎所佩印不屈死大同總兵汪登瑞餘姚人聞變絕粒死呈貢知縣黃卷鍾祥人家居聞京城失守北向長號不食死布政參議王若之益都人僑寓金陵甲申聞難不食嘔血死臨漳知縣梁希阜龍泉人未赴任聞京師陷痛哭不食死天津道陳六韜在天津築興濟城死甲申之難刑科給事中李汝霖南昌人抗疏下獄尋赦歸聞國難衰經北拜絕粒死御史鄭封祥符人出使廣西聞京師陷與子庚錫遁山中封不食死庚錫亦死舉家殉之兵部主事尹詔石

城人上疏許時相譴歸聞甲申變不食卒永平通判韓
上桂番禹人聞京師陷號泣卒知縣毛協恭武進人聞
難殺水死西甯副使李豫鄆城人聞京師陷慟哭不食
死巡撫甘肅楊汝經睢州人行次林縣聞京師陷帥壯
士討僞官遇賊被害延緩總兵宋偉山陰人甲申服鴆
死監察御史王與印俱總兵新城人謫歸甲申聞變與
子士和拒戶自經妻子亦縊死大常少卿傅鍾秀高
密人號泣須髮一夕盡白與主事單崇謀起義爲賊執
大罵不屈死子稟初以翼父竝殉劉河游擊李中孚上
海人甲申戰沒入祠職官卷內有鴻臚寺鳴贊官石永
昌單縣人甲申之難從指揮李若璉同殉節于京邸東
城兵馬司陳懋芮城人京師陷自縊死涇陽訓導劉彰本保安
大興人方歸家都城陷自縊死涇陽訓導劉彰本保安
人時銓授未行京師陷自縊死涇陽訓導劉彰本保安
諭時躋長步在籍城陷與妻李氏二子泰壯俱死
安肅訓導張文浩博興人城失守死之海豐教諭厲必
中日照人聞京師陷不食死千戶陳應鵬定海人甲申
聞難自縊死孝陵衛董啟明里貫未詳甲申聞難自經
死嘉定訓導劉芳遠和州人聞北都陷整衣冠北向拜
坐明倫堂自刎死興安州同覃天明都陷整衣冠北向拜

都城陷不食死訓導陸士鉉平湖人甲申聞難大慟絕
粒死又入祠士民卷內布衣馮蠡縣人賊陷蠡縣死
之歲貢陳嘉猷慶都人賊陷慶都拒戰死生員祝洪
順天人李紹同妻王縊死舉人黃自彩江南人聞難自
縊死舉人李毓梁孟縣人賊陷京師時徵赴西安送妻
與二子入山自縊死進士石崖三原人聞京師陷數日
不食死生員許王家顧維寰俱長洲人甲申聞難死生
員常州駁紹賢金壇王崇國王榮國王希高俱從王明
顏死之生員王養心徐州人聞京師陷痛哭絕粒七日
自縊死舉人馬嘉邗門人聞都城陷投縶死生員李幹
才鹽城人聞京師破不食死生員張秉純徐正夫俱和
州人聞京師陷乘純絕粒死正夫自縊生員張不二含
山人聞變號泣絕粒死生員蒙陰陳主忠滋陽唐賓曹
縣趙振極單縣孫國顯城武劉武聚卽墨王曦如俱甲
申殉節死生員王啟賢王採符應第符應舉符振芳俱
饒陽人甲申城破死之生員張玉瓚順天人都城陷同
妻魏投井死生員蔣士忠順天人同妻黃投金魚池死
生員徐燦順天城陷同妻鄔合家自焚死生員魏起
元順天城陷與蘭衛卿等皆合家殉之生員鄒欽堯
瑞安人聞難沈永甯江死生員陳則從平番人城陷不

食死真生溫元春生員杜桂枝金章王汝盤監生郭梁
 俱安定人聞京師陷散家財倡義同殉節生員徐嶧常
 然人衣冠赴文廟泮水死舉人周元孝叙州人賊執之
 不受僞官死童生周汧大興人京師陷悲憤嘔血數升
 死布衣聞守義順天人都城破罵賊被創死妻李自縊
 婢從之布衣田祥宇大縣宛平人合門自焚死布衣唐
 文運密雲人痛哭飲死屈坦之祝舜齡俱常熟人甲
 申死節孫源文無錫人聞京師陷啞血死周日曜桐城
 人絕粒九日死陳公誥貴池人聞京師陷痛哭自經死
 文襄絳州人賊陷京師死之布衣光岳奇信陽人聞京
 師陷躍井死布衣王汝紹金壇人聞難死節太學生顧
 杲端文之孫甲申殉節布衣彭月浴甯鄉人京師陷死
 之劉鳳池溧水人聞賊入都赴水死京營卒徐道宛平
 人守安定門昌矢擊賊城破陸城死又有賣菜傭不知
 姓名京師陷在布衣過東安門哭先帝后畢觸石死髯樵
 叟吳縣人采薪洞庭山中聞京師陷號慟走百泉躍入
 德富輝人方執鈕田間聞京師陷號慟走百泉躍入
 水死農夫鞠鳴秋長山人聞甲申之難大慟自經死以
 上所記亦有南都殉難而誤入者如
 顧杲鄒欽堯之等別詳增記卷中